

Անդրէատ Արծրունին: Այս պատկառելի գիտնականը, որքան ես յիշում եմ, 1875 կամ 1876 թ. Սղնախի, Թեւաւի և Զաքարթալի վրայով ճանապարհորդելով, հասաւ Նուխի և այնտեղից Ուտիախօս Վարդաշէն տաւնը և ապա սկսեց իւր ճանապարհորդական տպաւորութիւնների մասին գրել 76 թ. «Մշակի» զանազան համարներում: Բայց շատ ափսոս, որ ձեռքիս տակը չունիմ յիշեալ թերթի այն համարները, որոնցից կարողանայի օգուտ քաղել: Այսու ամենայնիւ, որպէս ուտիական անբախտ երկրի նժդեհ զաւակ, ինձ աւելի քաջ յայտնի են այդ ժողովրդի նիստն ու կացը, նրա բարքերն ու սովորութիւնները, քան թէ ուրիշ որ և է մէկին:

Հայոց պատմութիւնից և աշխարհագրութիւնից մեզ յայտնի է, որ Ուտի կամ Ուտիացոց աշխարհը համարւում էր Մեծն Հայաստանի 15 նահանգներից մէկը, որի սահմաններն են՝ հիւսիսից Գաղստանը և Կովկասեան լեռնաշղթան՝ մշտապէս սպիտակ ձիւնով պատած իւր Շահ-դաղ կոչուած գագաթով. արևելքից՝ Կասպեան ծովը, հարաւից Փայտակարանը և Սիւնեաց լեռները, իսկ արևմուտքից Գուգարաց աշխարհը:

Այդ ընդարձակ, բերրի, պտղաբեր, ջրբառատ և հարուստ բուսականութեամբ լի ակնապարար հովտում ապրում էին հին ժամանակ մի քանի հարիւր հազարից բաղկացած Ուտիացիք, որոնք հոգով, սրտով, կրօնով և ջերմ զգացմունքներով սերտ կերպով կապուած՝ ապրում են իրենց ազգակից և հաւատակից Հայի հետ միասին,